

Y Rhai sy'n Gofalu

Darlleniad: Philipiaid 4: 10-20

O! Dduw, ein Gwardwr, tydi, yr hwn a ddaeth o'r nefoedd i'n daear ni i dy uniaethu dy hun â ni, tydi, yr hwn a lafuriodd fel saer, a iachaodd y cleifion, a fu'n athro i'r di-ddysg, tydi, yr hwn a brofodd dlodi a newyn a syched a blinder marwol, gwrandu yn awr ein deisyfiadau.

Gwrandu ein gweddi dros bawb sydd, trwy ofalu am eraill, yn dilyn ôl dy droed, ac yn efelychu'r ysbryd o wasanaeth ac ymroddiad a ddangosaist yng Nghapernaum flynyddoedd maith yn ôl.

Gweddiwn dros feddygon sy'n trin corff a meddwl, a llawfeddygon sydd, â'u medrusrwydd, yn gwella clwy ac yn lliniaru poen.

Gweddiwn dros bawb sy'n gweini ar gleifion, ac yn gofalu am yr hen, y methodig, a'r amddifad.

Gweddiwn dros fydwragedd yn ein hysbytai wrth iddynt gynorthwyo mamau yn awr eu llafur i ddod â bywyd newydd i olau dydd, ac am eu gofal cyson am y teulu.

Gweddiwn dros y rhai sy'n gyfrifol am 'gymorth cyntaf' - gwŷr a gwragedd yr ambiwlans, y frigâd dân, a'r bad achub. Diolchwn am eu dewrder a'u diysgogrwydd cysurlon mewn argyfwng a pherygl.

Gweddiwn dros rieni yn eu gofal cariadlon o'u plant.

Gweddiwn dros athrawon ysgolion a cholegau yn eu gwaith o hyfforddi ein plant a'n pobl ifainc.

Gweddiwn dros y rhai sy'n gofalu am ein hanghenion ysbrydol, yn offeiriaid a gweinidogion.

Gweddiwn dros y rhai sy'n gweithio dramor, megis cenhadon sy'n

rhannu'r newyddion da mewn gair a gweithred.

Gweddiwn dros weithwyr cymdeithasol a phawb sydd ynghlwm wrth waith gwirfoddol.

Gweddiwn dros bob gwaith ymchwil gan wyddonwyr fydd yn cynyddu ein gallu i drin afiechydon o bob math, ac yn gwella ein safon byw mewn amryfal ffyrdd ymhell i'r dyfodol.

Gweddiwn dros fudiadau dyngarol; mudiadau megis Cymorth Cristnogol, Oxfam, Cafod, Y Samariaid, a llu o rai eraill.

Gweddiwn dros y rhai di-sôn-amdanynt; y rhai sydd bob amser yn barod iawn eu cymwynas, a heb ddisgwyl cymwynas yn ôl. Pobl y gallwn ddweud amdanynt eu bod yn halen y ddaear!

Gweddiwn dros y rhai sy'n gyfrifol am gyfraith a threfn - yr heddlu, cyfreithwyr, barnwyr, a'r rhai sy'n gofalu am garchardai.

A gweddiwn dros y rhai sy'n ein hamddiffyn ar dir, môr ac yn yr awyr.

O! Arglwydd, ein Tad Nefol, yr hwn yn ôl dy ragluniaeth sy'n pennu ac yn trefnu ein gwahanol ddyletswyddau, caniatâ i bawb ohonom ysbryd i ymdrechu â chalon lawen i gyflawni ein gwaith yn ein gwahanol gylchoedd fel rhai'n gwasanaethu un Meistr ac yn chwilio am un wobwr. Dysg inni wneud y defnydd gorau o ba dalentau bynnag a roddaist inni, a galluoga ni i brynu'r amser gyda mawr amynedd a sêl, trwy Iesu Grist ein Harglwydd. Amen.

Dewi Roberts